


明朝典彙



			九	漢
		一	〇	書
		二	五	門
		三	類	
六	一	〇		
四	三	四		
冊	架	函	號	類

庫	文	閣	內	
九	〇	五		漢
四	三	四		書
函	冊	號	類	

內閣文庫	
番號	漢 9205
冊數	64 (37)
函號	294 39

世



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



Kodak, 2007 TM: Kodak





國朝典彙卷九十九



卅

都察院右僉都御史臣徐學聚 編輯

南京光祿寺卿臣劉宇烈 訂正

十三

附恤孤貧



者四方鼎沸生民之禍極矣天道厭亂人心思治故作
難者皆底滅亡今疆土雖定然中原不勝凋弊東南雖
已甦息而錢穀力役又皆仰之果何時可以休息也同

對曰陛下撫念瘡殘憂勞於心誠天下蒼生之福也
上曰苦寒者思溫執熱者思濯今民之思治甚於寒之
思溫熱之思涼正當有以濟之

三年正月西安鳳翔二府饑戶部奏須運粟以濟
上曰然曰民旦暮待食若須運粟死者多矣况今東作方興
民無食而廢耕其患益甚卽令戶部主事李亨馳驛往
賑之戶給粟一石計三萬六千八百八十九石

十年勅中書省曰嚮荆蘄等處水災朕寢食不安亟命戶
部主事趙乾往賑之豈意乾不念民艱坐視遷延自去
年十二月至今年五六月之交方施賑濟民饑死者多

矣夫民饑而上不卹其咎在上吏受命不能宣上之音
視民死而不救罪不勝誅其斬之以戒不卹吾民者

十七年河南河決北平旱災勅駙馬李祺等往賑之

十九年四月詔遣御史蔡新給事中宮俊往河南檢覈被
水人民有賑濟不及者補給之

二十年青州旱蝗民饑有司不以聞有使者奏之
上謂戶部曰代天理民者君也代君養民者守令也今使者
言青州民饑而守臣不以聞是豈有愛民之心哉其亟
遣人往賑之就逮治其官吏

二十六年四月孝感縣言民饑官有預備倉糧萬一千石

請以貸民卽命行人乘驛往給之

上諭戶部曰朕常捐內帑之資付天下耆民糴粟以儲之正欲備荒歉濟饑民也若歲荒民饑必候奏請道途往返遠者動經數月民饑死者多矣爾部卽諭天下有司自今凡遇歲饑則先發倉廩以貸民然後奏聞著爲令永樂二年六月命太子少師姚廣孝等往蘇湖賑濟諭之曰人君一衣一食皆民所措民窮無衣食君豈可不恤君父也民子也爲子當孝爲父當慈各盡其道爾卿往體朕此心不可爲國惜費蓋散財得民仁者之政也三年諭戶部比蘇湖被水民饑求食它郡令所在官司善

加撫綏毋驅逐之候水退復業無糧食種子官給之

命戶部尚書夏原吉僉都御史俞士吉左通政趙居住大理少卿袁復賑濟蘇松嘉湖饑民上曰四郡之民頻年厄於水患今舊穀已罄新苗未成老穉嗷嗷饑餒無告朕與卿等能獨飽乎其往督郡縣發倉廩賑之所至善加綏撫一切民間利害有當建革者速以聞

五年五月上聞河南饑而有司匿不以聞因命刑部悉逮寘於法又謂都御史陳瑛曰國之本在民民無食是傷其本朕自嗣位以來夙夜以安養生民爲心每歲春初及農隙之時勅郡縣濬河渠修築圩岸陂池捕蝗蝻

遇有饑荒卽加賑濟比者河南郡縣荐罹旱澇有司匿不以聞又有言雨暘時若禾稼茂實者及遣人視之民所收有十不及四五者有十不及一者亦有掇草實爲食者聞之惻然亟命發粟賑之已有饑死者矣此亦朕任用匪人之過已悉寘於法其榜諭天下有司自今民間水旱災傷不以聞者必罪不宥

八年正月 皇太子監國以去年江北水患遣副都御史虞謙給事中杜欽往揚州淮安鳳陽直抵陳州視軍民疾苦免其被災田租鬻還典賣子女

三月虞謙杜欽啟潁州軍民缺食請發廩賑貸 皇太子啟人馳諭之曰軍民困乏待哺嗷嗷卿等尚從容啟請待報汲黯何如人也亟發倉賑之勿緩

九年七月戶部言賑北京臨城縣饑民三百餘戶給糧三千七百石有奇 上曰大旱民饑隋文帝不發倉賑聽民流移末歲計所積可供五十年今國家儲蓄上以供國下以濟民故豐年則歛凶年則散但有土有民何憂不足隋開皇間倉廩雖豐民心不瞻煬帝無道遂至滅亡前監具在今後但遇水旱民饑開倉賑給毋令失所十年正月山東稷山等縣耆老言歲歉民饑採蒺藜掘蒲根以食乞賜寬貸徵賦命戶部遣官賑濟其布政司及

所屬郡縣官蔽不以聞者悉械送京師論罪

四月山西平陽翼城等郡縣民饑遣戶部員外孫恪賑之
凡十六萬九千六百餘戶給粟三十一萬四千石有奇
六月陝西西安等府老人詣闕謝賑濟恩命給道里費遣
還 上問今歲禾稼何如對曰來時甚茂 上曰禾稼
雖茂民力未甦凡所借用官糧今年不責爾償候下年
豐熟令償老人叩頭謝 上命戶部山東山西皆准此
例凡經賑者悉免詣闕謝恩

勅戶部曰朕爲天下主所務者安民而已故每歲遣人巡
行郡邑惟欲周知歲之豐歉民之休戚近者河南民饑
有司不以聞往往有言年穀豐登者若此欺罔獲罪於
天此亦朕任非其人之過其速令河南發粟賑民自今
凡郡縣及朝廷所遣官目擊民艱不言者悉逮下獄
八月定陶中牟等縣耆民詣闕謝賑濟 上諭戶部曰天

子以天下爲家則以天下爲休戚比念民饑令有司發
粟賑之此國之恒卹况郡縣儲蓄正爲民計而使人廢
其農業遠來謝恩非朕意也其未至者移文止之
十二月戶部言邳州水災民乏食命御史乘傳往賑之
十一年夏 上謂戶部曰人從徐州來言州民以水災乏
食有鬻男女以圖活者人至父子相棄其窮極矣卽遣

人馳驛發廩賑之所鬻男女官爲贖還

十二年十二月以陝西旱命成山侯王通偕戶部官馳傳往賑凡賑饑民九萬八千餘戶給米十萬四千三百餘石鈔十二萬六千三百錠

十四年六月戶部言衛輝府新鄉縣安樂州北直通州及順義宛平二縣蝗命速遣人補瘞

十七年 上聞開徐等州縣民饑慨然嘆曰君以民立國古人所以致雍熙之世者其道始於民足衣食雖有水旱災傷而民不致於饑窘者則恃蓄積有素但如漢文景之世太倉之粟陳陳相因太宗時民間斗米三錢行

旅不賫糧亦何憂水旱 皇考置預備倉出內帑易粟儲之以賑饑荒此誠良法然有司必至饑民嗷嗷始達於朝又必待命下乃賑之其餒死者已不逮矣其令有司今後遇饑荒急迫卽驗實發倉賑之而後奏聞可也今各處所奏民饑宜急遣官賑之

洪熙元年六月河南新安知縣陶鎔奏縣在山谷土瘠民貧從來薄收去年尤甚今民食最艱採拾不給公私無措獨亟驛頗有儲糧欲申明待報而民命危在旦夕已先借糧一千七百二十八石給之俟秋成還官 宣宗謂夏原吉日知縣所行良是朕聞近年有司不體人情

苟有饑荒必須申報展轉勘實賑濟失時民多饑死陶
鎔先給後聞能稱任使毋拘文法責其專擅

宣德元年四月戶部奏比者青州府言民艱食請借官糧
賑濟而未見開報饑民多寡之數請覆勘然後給上
曰民饑無食濟之當如拯溺抹焚不可少緩若待覆勘
而行豈不有餓死者宜遣人馳驛往山東令布政司與
府官就便分給庶幾有濟

六月河南布政司奏安陽臨漳二縣蝗上謂夏原吉等
曰近者有司數言蝗蝻此亦可憂姚崇捕蝗終不爲災
但患捕之不早耳卿宜遣人馳驛分督有司巡視若遇

蝗生須早撲滅毋遺民患

二年閏三月工部侍郎李自新自河南還言山西饑民流
入河南者十萬餘口爲有司軍衛所捕逐上謂夏原
吉曰民饑流移豈其得已仁人君子所宜矜念昔富弼
知青州存卹流民飲食居處醫藥皆爲區畫山林河泊
之利聽流民取之不禁所活至五十餘萬今乃驅逐使
之失所不仁甚矣其卽遣官往同布政司及府縣官加
意撫綏發廩給之隨所至居住敢有逐捕者罪之

十二月上謂夏原吉等曰今年陝西亢旱秋田無收其
軍屯子粒民間秋糧俱已蠲免比因軍民之中多因缺

食流離豈可不恤其令有司開倉賑濟仍於南京運絹五萬疋綿布十萬疋令隆平侯等用心拯救勿令失所三年四月解州潞州奏天旱民饑多流移他境上覽奏惻然謂夏原吉曰比聞山西久不雨朕心不安今果奏至其卽遣人賑濟且撫綏其民毋令失所又曰聞旱災之地頗濶弭災之要修省在朕卿亦當敬慎勉盡乃職四年五月永清縣奏蝗蝻生上問左右曰永清有蝗未知他縣何似錦衣衛指揮李順對曰今四郊禾黍皆茂獨聞永清偶有蝗耳上曰蝗生必滋不可謂偶有命戶部速遣人馳往督捕若滋蔓卽馳驛以聞

五年江西饑掌吉水縣事知州柯暹勸富民出穀賑濟邑義民胡有初出穀一千五百石衆胥效之邑人賴焉巡撫趙新上其事詔賜璽書褒美復其家遣行人勞之易州奏蝗蝻生上謂都御史顧佐曰今禾苗方生宿麥漸茂而蝗蝻爲災若不早捕民食無墾卽選賢能御史往督有司發民併力撲捕初發撲之則易若稍緩之爲害不細

十年給事中年富言江南小民佃富人之田歲輸其租今詔免災傷稅糧所蠲特及富室而小民輸租如故乞命被災之處富人田租如例蠲免又言各處饑饉官無見

糧賑濟間有大戶贏餘多閉糶增價以規厚利有司絕無救卹之方乞命自今或遇荒歉爲貧民立券貸富人粟分給仍免富人雜役爲息候年豐償本從之

正統元年四月命侍郎王士嘉邵旻都御史陳鼎魯穆大理寺少卿程富巡視順天等八府賜之勅曰今命爾巡各郡遇有蝗蝻生發隨即催督衛所州縣起集人夫打捕盡絕毋致滋蔓以貽民患往者差官捕蝗不體朝廷恤民之心肆行箠楚民受酷虐甚於蝗災爾宜深戒務在設法使人不勞困禾不損傷庶副朕恤民之意欽哉
四年六月京師大水令戶部侍郎吳璽順天府尹姜濤存

問賑恤

上以旱潦相仍命山海至密雲地方軍民缺食者聽採取湖山榛果紫魚蝦之類以自給仍戒權勢毋專利爲害
五年三月命御史薛希璉舉江西荒政希璉所至以便宜剗奸弊廣儲蓄增築陂塘以興水利變通有法寬猛得宜民惠賴之能聲益著事竣陞刑部右侍郎尋命視畿內廣平等處旱蝗

七年勅吏部侍郎魏驥通政司叅議大理寺少卿賀祖嗣光祿寺丞張如宗大理寺丞仰瞻往南北直隸捕蝗
八年三月命工部侍郎王永和巡視淮南水災

十年五月圻輔民饑命大理少卿李奎賑濟
七月巡撫河南山西大理少卿于謙奏近者山陝人民饑
窘俱往河南地方起食訪得懷慶河南二府倉糧見有
六十餘萬石乞糶與饑民依時價收鈔解京 上謂戶
部曰凶年減價糶以利民此古良臣爲國救荒之長策
也今謙爲朕舉行甚可嘉尚其馳報謙如奏行毋緩
十二年四月畿內蝗命僉都御史張楷往捕
十三年六月巡按河南御史奏開封府及汝陽縣蝗禿鷲
萬餘下食之禾稼無損秋成可期 上曰禽鳥能除民
害卽禁民勿使捕之

景泰二年四月廬鳳徐淮諸郡大饑巡撫都御史王竑發
廣運倉賑濟全活二百二十九萬餘人 上聞而嘉之
陝西民饑命左都御史陳鑑賑之

八月畿內蝗命大理少卿陳詢巡視

三年四月命僉都御史王暹賑濟徐州饑民

四年蘇松民饑乞粟富家不與遂火其屋蹈海避罪時遣

大學士王文往訊之文以謀叛連坐五百餘家衆莫敢

發大理寺卿薛瑄抗章辯雪文亦悟其非獲免者甚衆

命禮部侍郎鄒幹賑河南鳳陽等處大水奏免本年稅糧

五年順天河間二府民饑命刑部侍郎周瑄往賑時二府

素無蓄積又連遭大水瑄奏乞裁省冗官停徵糧草免
追久欠馬騾牛羊暫罷供用柴炭夫役聽民採取皇莊
湖泊之利及招商納鹽糧損其半數借水次官倉之粟
濟民凡七事行之又議爲之具耕牛種子以便於民時
亢旱苗稿行部至武清懇告於上下神祇是夕大雨
天順元年四月山東薦饑發內帑銀三萬兩命僉都御史
林聰賑濟有司奏請增給 上召閣臣徐有貞李賢問
曰可從否賢對曰可有貞怫然曰不可發銀賑民里胥
滋弊民無實惠賢曰雖有此弊民方待哺不可不救也
遂增銀四萬兩

成化二年二月命禮部給度牒鬻僧以賑濟饑民

閏三月濟州衛典史喬昇言朝廷以淮揚等處饑饉勅命
賑濟而州縣官將賑濟錢糧銀雜銅鉛米和糠土不堪
貿易食用戶部請將作弊官吏人等通行究治官發邊
衛充軍民發口外爲民後有犯者一例解京處治從之
巡視淮揚都御史林聰言鳳陽諸處災傷查得兩淮運司
儀真批驗鹽引見有沒官鹽二萬餘引已行召商定價
及淮揚所收鉛料鈔亦行暫改收米以備賑濟從之
四月南京僉都御史高明言上元民匠高朋同妻龐氏將
隣家十歲幼女烹食實由饑餓所逼請發軍儲倉糧數

萬石借與貧民候秋成時還官 上命戶部定議以聞
六年七月京畿水災民饑命右都御史項忠巡視順天永
平河間三府吏部侍郎葉盛巡視真定保定二府忠發
官廩又勸分得米十六萬五千石銀布牛具各萬餘全
活不可勝計盛審貧困招流亡全活甚衆

九月大學士彭時等言北方山東六府直隸大名廣平順
德三府及河南地方夏麥無收秋田未種雖經累報災
傷有司未免照例覆勘請勅三處巡撫官設法賑卹凡
災傷州縣今年夏稅并戶口食鹽鈔貫照數蠲免其見
今追陪各項馬匹亦暫停止太僕寺丞暫令回京待後

豐年再令買補如此庶民困或可少甦流移或可少息
從之時等又奏京城米價日貴一日在京蓄積之家因
而閉糴以要厚利乞命戶部將官俸軍糧預放三月如
又不足將東西太倉米平價發糴收貯價銀待豐年支
與官軍折俸其德州倉糧亦宜量數發糴以濟河間之
急此令一下庶幾人不閉糴米價可平且荒年盜起不
時出沒乞命錦衣衛早加緝捕庶免貽患 上嘉納之
七年正月京師饑命戶部侍郎陳俊發太倉粟一百萬斛
減價發糴以利民時權貴有乘以射利者俊請凡糴以
升斗計滿石以上者閉不與 上從之其計遂阻

十三年 上以山東兗州及南直諸府州水災民饑諭戶部推擇郎中員外廉能可任者五員分往賑濟其有合行事宜斟酌以聞戶部以郎中張文等五人名上并提區畫鹽鈔納米冠帶節省夫役廩給諸事 上皆可之十四年八月 上諭六部山東北直隸各府軍民災傷甚重爾等其以該徵追糧草馬匹等項并一應差役當停止分豁者具奏來聞再差各衙門能幹官與勅分往賑濟巡撫直隸都御史汪霖速令回任江西亦被水災令南京刑部侍郎金紳領勅巡視

二十年陝西大饑民采桑椹食或父子兄弟相噬巡撫鄭

時奏請發襄陽糧及內帑各數萬賑濟因檄布政司等官分守城西門給饑民食無敢侵漁者每朔望必至文廟行香升明倫堂令諸生講書人問其故時曰方今人情洶洶皆欲爲亂在諸生既有賑又儆省以遵王之義異言不作何由起亂人心果定 上特璽書獎勞

五月京畿陝西河南山東山西大旱禮部議令各處僧道關給度牒就彼納米賑濟湖廣鎮守太監韋貴議饑民南流數多驅之則恐激變賑之官糧有限欲行山陝河南北直隸巡撫督令各該州縣將新舊流民着該管里長招撫復業大學士萬安等議令山陝生員有納米者

廩膳八十石增廣一百石俱赴陝西缺糧倉分上納起
送國子監讀書軍民舍餘人等有納米者授以軍職百
戶納二百石副千戶納二百五十石正千戶三百石指
揮照例加米定與衛分帶俸又命侍郎耿裕徐溥祭告
西嶽西鎮西海大河之神南兵部尚書王恕言臣惟山
陝連年災傷上項恩例恐願納者寡南直隸浙江江西
湖廣每處差給事中御史郎中二三員前去會同彼處
撫按督同守巡官召募僧道生員軍民舍餘人等各照
米數每石納銀一兩給與文憑度牒其銀就合原差官
分送山陝河南給散賑濟其流民之在荆襄者要令該
管里老招撫復業恐里老亦多流移料無人可差且家
業已失田野無望又無口食豈能回還臣恐拊循失策
必爲盜賊勞師動衆所費益多合無將湖廣今年該起
運南京各倉及兌軍秋糧量留一二十萬石又將河南
該兌軍秋糧量留一二十萬石俱運赴荆襄水次倉賑
流民以銷後患臣又深慮召募僧道生員人等銀兩急
不能得合無先出內帑銀二三十萬兩速發山陝河南
賑濟如內帑不足請諭貴戚近臣及在京富戶那移前
去待後日照數酬還仍乞降詔將被災府縣今年稅糧
買辦等項盡行蠲免庶幾全活生靈潛消後患

七月河北燕南諸省大饑分遣大臣賑卹之

九月山西巡撫葉淇奏山西連年災傷乞給太倉銀數萬兩以備賑濟詔發京庫銀三萬遣官齎付淇糴糧應川俟豐年徐議還官

三十一年閏四月命刑部侍郎何喬新賑濟山西饑民

弘治七年六月江南巡撫何鑑因水災條陳折兌運折祿米折食米折軍糧停料價停織造留船料留稅課鈔關鹽引存工價共十事以聞又疏乞照往年川陝存留折銀二十萬兩兌軍米三十萬石分賑各屬皆准行之

八年十月鄖陽撫治沈暉奏請以鈞州太和宮觀香銀糴

穀賑饑從之

十四年十一月吏部尚書馬文升言直隸山東河南等處災請行恤典并簡命臣僚以便宐賑濟因嚴捕盜賊停止科差以甦民困以固邦本上命刑部侍郎何鑑大理寺丞吳一貫奉勅賑濟其餘有災處行令各巡撫等官加意設法賑恤毋得虛應故事鑑首陳五事一借糧餉以資賑濟二乞通融以秣時艱三停料價以止無益四寬差役以甦民力五停工作以待豐穰悉報可十五年五月兩浙大饑命副都御史王璟巡視璟倣富弼青州秣荒法行之

十六年命南工部侍郎高銓賑濟江淮陳荒政入事從之
正德元年七月南京給事中石祿等奏頃歲山移地裂水
旱頻仍風霾蔽日雨雹殺人爲變不一被災之所宜遣
官賑濟招撫或蠲其賦稅減其科徵戶部尚書韓文等
覆議槩欲差官徒勞無益宜俟奏報至日量其輕重如
例上請蠲貸惟江西南贛建昌等府之民死於嵐瘴者
無算鳳陽等府大雨如注平地水深丈有五尺沒民居
五百餘家寧夏左屯衛紅氣薰天繼以猛火燬城樓臺
堡官軍房屋牲畜幾盡并傷男女三百五十人是乃異
常之災宜移文各該巡撫親詣其地加意撫恤貧民之
困於差役者卽與優免廬舍之泮沒營堡之燒燬者官
給錢糧量爲賑濟仍督所屬官吏招撫流移禁革科擾
庶災異可弭 上曰民困可憫其如擬

三年五月劉瑾矯詔勅南京運米三十三萬石轉恤鳳陽
南兵部尚書何鑑言留都地方重於鳳陽災傷甚於淮
西會同內外守備直言辯奏始得停運及得差官賑濟
六月河南湖廣災命南工部侍郎畢亨兼僉都御史巡視
四年正月南直巡撫羅鑒奏丹陽金壇二縣民饑尤甚請
借撥蘇常二府各米千石穀九千石賑之其蘇松常及
嘉湖等府米亦騰貴宜放預備倉糧減價量糶貯其銀

於官俟年豐糴穀備賑部覆如議 上曰歲歉民饑朕所軫念借撥放糶俱如擬行之然賑濟當先及於小民務須計處周詳不可使豪右挾勢規利致生奸弊

十月湖廣巡撫王綸奏境內歲稔欲行武昌漢陽禮勸富民納粟賑濟立表刻石以旌之若恃富黨惡不從者疏聞究治戶部言荒政在於恤民若窮州下邑槩欲勸分恐官吏乘機科害武漢富民頗多宜如擬勸借出米千石以上者表其門九百至二三百者授散官自從六品至從九品凡四等仍刻石旌名其餘州縣原有侍郎畢亨奏留餘銀可備賑濟不必勸借今年該徵兌運糧米

宜量折十五萬石以其加耗爲給賑之助 上是之

六年十二月僉都御史叢蘭巡撫廬鳳滁和等處兼賑濟兵荒蘭賑濟全活十二萬六千八百口撫釋脇從男婦幾六百人 事聞賜勅獎勵資金帛

十三年給事中李長奏直隸山東霽潦瀰漫五穀絕望流徙京師死亡枕藉乞先將已故者葬埋其羸弱僅存者量給米銀令各回鄉 上曰流民情可矜憫人給米三斗令各歸鄉以聽賑濟死者官爲瘞之各巡撫其督有司加意撫卹毋致失所給事中邵錫言去秋雨水畿輔大饑乞遣大臣賑卹 上命僉都御史李鉞奉勅往

國朝通志卷九十九
四月淮徐等處歲饑巡撫叢蘭奏截漕運粟數萬石及益以倉儲賑濟下部議行之

湖廣歲饑命副都御史吳廷舉查各處倉粟賑之

十六年十一月江西兵災相仍詔發本省倉庫賑民仍留糧銀十萬兩不足則量以所贖宸濠產置濟之從巡撫

鄭■巡按唐龍請也

鳳陽巡撫陶琰奏准徐連歲災傷乞蠲免田租并請兩淮運司餘鹽銀及淮揚二鈔關船料銀十五萬兩給賑戶部議會鹽銀供邊難借從其鹽料議令琰查處上以淮徐要地特許船料外仍發太倉銀三萬賑之

嘉靖元年南京兵部侍郎席書言南畿民饑殊甚考古荒政可行於今日者惟作粥一法不煩審戶不待防奸至簡至要可以舉行而世俗咸謂不便蓋緣曾有舉於一城不知散布諸縣以致四遠饑民聞風併集王者勢不能給致民相聚而死遂謂此法難行臣今總計南畿作粥江南北可四十二州縣大都大縣設粥十二所中縣減三之一小縣減十之五諸所設粥處約日竝舉凡以饑來者無論本處隣境軍民男婦老幼口多寡均粥給濟起今十一月半抵麥熟止計用米不過十六萬石銀十六萬兩可活人二十餘萬戶部覆此法不特宜於南

畿宜通行天下災荒處所一體施行
一二年北畿山東河南湖廣江西俱有旱災而應天蘇松淮揚徽池等十四郡又徐滁等州爲甚千里盡赤孳殍載道姦盜因之蠡起南京給事中顧濬等御史吳瀚等俱以爲言欲責成守令招撫存卹下戶部議尚書孫交請留蘇松折兌銀兩折鹽價蘇常粳白米潁墅關鈔課應天府缺官皂薪贖緩等金兼賑從之又請發太倉銀二十萬兩折漕米九十萬石往賑亦從之
詔蠲太岳太和山香錢一年備賑從湖廣守臣請也太監潘真奏留不許

三年二月南京大疫先是大旱江南北流民來就食者數百萬有司設粥隨食隨斃至春蒸爲疾疫比屋死亡百無一存墻傾屋塌如無人境人鬼縱橫可駭可怖支糧正軍已減五萬而流民還者百無一二至秋始定

時南畿諸郡大饑巡按淮揚御史朱衣言人民爲饑所迫父子兄弟夫婦之間多相殘賊婺婦劉氏食四小兒百戶姚臣王堂以子鬻母軍餘曹洪以弟殺兄王明以子弑父且地震霧塞臭彌千里更乞大爲賑卹先是以席書爲戶部侍郎督賑江淮發帑截漕賑之至是以衣言復發帑金十五萬兩分賑淮鳳二府

給事中張漢卿等言先該戶部覆題應天等府亢旱欲動支淮浙運司餘鹽銀兩賑濟但前項區處銀兩類非見在往賑官員何所措手饑困之民朝不謀夕若俟文移往來緩不及事乞特發太倉銀兩星馳往賑庶幾有濟上曰直隸地方災傷重大人民流離困苦朕心惻然戶部卽發太倉庫銀十五萬兩付差去賑濟侍郎都御史等官分賑應天淮鳳等府務使窮民各沾實惠

五年巡按順天御史張珩言畿內凶荒乞加賑卹部議乃命郡縣倉庾悉數給散不足則發通太倉錢穀補助之七年十一月上諭戶部朕聞河南陝州甚荒人相殘食

何不亟行賑救夫災變重大若此豈彼處鎮巡官未嘗具奏耶其據實以對尚書鄒文盛等言河南全省皆饑臣已請留兌軍糧五萬石行賑陝州饑甚鎮巡官並未言及今請再留五萬石兌軍糧賑之報可

八年二月湖廣襄陽大饑巡按御史張祿繪饑民圖以獻詞甚慘切時已有旨留顯陵宮銀及貴州折兌銀備賑上覽祿奏復感動亟命部臣再申前旨下所司多方處分使民沾實惠有司奉行不謹及作弊者悉論如法

三月河南巡撫潘垣言河南歲大饑近發帑銀五萬兩尚不足賑上命盡發河南司府倉庫錢糧不足則移山

東臨清廣積二倉米二萬石濟之

廣東僉事林希元上荒政叢言言救荒有二難曰得人難
審戶難有三便曰極貧之民便賑米次貧之民便賑錢
稍貧之民便轉貸有六急曰垂死貧民急餽粥疾病貧
民急醫藥病起貧民急湯米既死貧民急埋瘞棄小兒
急救養輕重囚繫急寬卹有三權曰借官糧以糴糶興
工作以助賑借牛種以通變有六禁曰禁侵漁禁攘盜
禁遏糴禁抑價禁宰牛禁度僧有二戒曰戒遲緩戒拘
文戒遣使其綱有六其目二十有三各參酌古法體悉
民情條列上請戶部覆議舉行 上皆從之

四月 上夢黃衣者數人陛辭南行其勢甚速次日語閣
臣楊一清對曰黃者蝗也南方其有蝗乎是秋蝗果大
至在在皆滿數日爲大風雨飄入海盡死是時 上方
勵精圖治故見夢且能消弭云

六月山西大饑參政王尚綱上救荒八議一曰愍饑饉乞
遣使行部問民疾苦二曰卹暴露乞有司祭瘞消釋厲
氣三日救貧民乞支散庾積秋成補還四曰停徵歛乞
截日在徵以俟豐年五日信告令乞勸分菽粟六曰推
糴買乞令無閉過七日謹預備乞申舊例措處積貯八
曰卹流乞所過州縣加意存卹勿使羣聚思亂戶部

覆議行之

九年四月行人楊爵有事湖廣山西還言畿內及河南湖廣山西俱復大饑乞徐議郊禮以省勞費 上勅部院曰邇來遠近之民饑莩在道聞諸奏牘實用憂戚內外臣工皆有分理之責而部院大臣及百司庶僚之首不可不佐朕安民其各諮議會奏以聞於是吏部尚書方獻夫等會陳重守令廣儲蓄 神卹障亾慎刑獄及蠲免救濟諸條 上采納之

給事中孫應奎言榆林一鎮災傷重大士馬捐瘠死亡無算骨肉相食商販不通烟火幾絕草根樹皮剝掘已盡


近復搗石爲粉用以療饑食多墜死言之傷心 上曰

所奏饑荒朕不忍聞於是僉議宜發太倉銀十萬兩往賑之給事中夏言請以僉都御史李如圭出撫和羅輸邊以全生命 上從之特召至御前面賜諭責其成功

十年九月 上幸西苑仁壽宮召大學士翟鑾李時左都御史汪鋐夏言等入見 上曰陝西饑荒已遣戶部侍郎葉相賑濟今相病宜何處鑾等請就用陝西巡撫劉天和或河南巡撫徐讚因言陝西初災傷重大後聞亦頗紓 上曰百姓艱難還用賑濟民乃天下之民也豈可不救又問吏部侍郎唐龍如何衆皆稱其才遂陞龍

兵部尚書兼右都御史總制陝西三邊管理賑濟 上
 復曰朕念陝西災傷重大民多死亡流徙故發銀三十
 萬兩遣官賑之欲令小民速沾實惠龍宜亟赴任相病
 得無規避否吏部勘聞有朋比者治其罪龍疏辭 上
 手詔荅曰卿才兼文武性資端亮朕特簡用卿其勿辭
 亟往視事展布才猷俾民得安副朕奉天憂民之意
 十三年直隸巡按李祺言鳳陽連歲旱疫民多亡徙請勅
 有司查勘荒田招集流民給以牛種督勸耕墾仍免其
 逋負歲稔則量加賑濟部議此法當通行天下從之
 十六年正月御史韓岳言京師米價翔踴請令有司收養

窮民及發太倉銀平糶以賑濟之部議倉糧既以時放
 而豪右乘賤居積價復騰貴宜嚴其禁 上令巡倉御
 史及緝事官嚴捕治之
 十七年四月戶部言各處饑民流聚京師宜令大興宛平
 二縣分地查覈錄名呈部人給太倉羨米三斗責令還
 籍給事中曾烜等言諸路俱有旱災而順天永平為甚
 饑民聞有大役匍匐就工乃今餓死城隅日數十人通
 會河側屍骸枕藉乞急發帑救卹及行各處賑貸從之
 十八年河南巡撫王杲言河南災甚待查勘請發文移往
 返動淹累旬乞先發內帑銀十萬兩遣官賑濟章下戶



部給事中郭鋈等亦以為言詔發臨清倉糧價銀五萬兩命主事王繼芳齎往併令王杲查盤回奏杲復奏言河南民饑甚所在倉庫錢穀及齎去銀僅可支兩月之用必復得銀十五萬兩有奇乃可戶部議發德州倉銀五萬二千七百餘兩及河南布政司貯庫解京富戶銀并開封府河道贓罰銀八萬兩詔如議

上幸承天至榮澤發行帑銀二萬兩賑鄭鈞二州且曰能活萬人否賞遼東巡撫劉璋山東巡按喬佑各銀幣仍令以禮獎勞山東叅議高登僉事張九叙遼事苑馬寺卿李珣以其賑濟有方全活者衆也

十九年二月清軍御史姚虞言今承天府修建陵宮及陽春等門其工作匠役俱官為召募故鄖陽襄陽及河南饑民皆來就役欲資口食携妻襁子不下萬計而匠作有額不能容收屯聚饑餓積屍載途猶多其尚存者或鬻子捐妻或剝木掘草或相向對泣或矯首籲天猶可言也及其父不顧子夫不計妻飄零於陰風積雪之中匍匐於墮垣荒壠之下臣不能盡述其狀謹命工為圖十有二敢效鄭俠之獻伏望聖明垂覽從宜賑卹下戶部議奏將郡縣預備倉糧人給三斗諭令回藉從之

二十年以順天所屬州縣災傷詔免稅糧有差仍祭太倉

銀二萬兩通倉米二萬石及各州縣預備倉糧銀相兼賑濟復出太倉米萬石減值發糶以平米價又以永平大饑發太倉銀六千兩通倉米六千石賑之。上以二府歲災憂念不已復遣主事許登瀛往會巡按御史議處務體朝廷純意弘濟民艱如或虛應故事責有所歸十一月命侍郎張漢往山西督賑被虜郡縣。二十四年諭掌詹事吏部侍郎孫承恩錦衣指揮陸炳曰方此春時民多疾疫朕體上天好生之命令爾等施藥於朝天宮以溥濟群生宐如諭行承恩奏邊方軍民亦宐救療乃復命錦衣千戶同道錄司官齎赴宣大山

西等處會同撫按給散務俾均霑玄惠以廣同仁之義上諭戶工二部朕仰承天命爲生民主夙夜兢兢治理未始少忽每念四方水旱及邊方多警如履淵冰但爲政在愛民必選賢守令今選者每不盡心以致官非其人民受其害朕見今歲以來天時少順連日風沙若有旱火之慮又邊務亦甚可虞有司俱不我體何有君逸臣勞之義所應賑濟及防禦諸務其急行撫按官及各邊總鎮官加意幹理如或失職僨事決不輕貸於是戶部言近來各處奏報災傷業已奉旨蠲免第諸司多玩愒虛飾民不受恩乘今賑卹之時令所在撫按加意督察

果有能先事儲蓄及時賑貸全活衆多者奏薦陞擢或
其廢職誤事叅劾黜治得旨近來水旱災傷皆由官不
得人或貪殘殃民致干和氣所奏依擬行各撫按嚴督
守令及時加意惠民貪酷害民者卽時具奏處治

二十五年七月京師霪雨給事中李珊疏請修省會雨已
止上曰霪雨爲災卽日躬禱已荷天恩賜霽修省不
必行朝廷有弊政當革者各官宜秉公指奏處分庶盡
應天之實因降諭戶部發銀米賑卹京師轉徙居民其
房屋傾圮者卹給之

二十八年正月甘肅巡撫楊博疏陳莊浪備荒事宜四事
言貧丁宜月給銀米糧料宜收買本色各倉宜收糶冬
米涼州宜謀種屯田疏下戶部議覆報可

三十年十一月詔以太和山今歲香錢及明年之半抵補
顯陵官軍俸糧及賑濟所屬災傷人戶

三十一年二月宣大二鎮大饑人相食兵部以聞因請借
軍餉銀賑濟上切責本鎮守臣不先上聞令各自陳
狀賑濟事宜命原差督餉侍郎馬坤馳往經理仍發庫
錢二十萬給之坤辭行奏舉主事劉爾牧自隨且言錢
糧不足充賑請加給十萬詔可

二十二年大學士嚴嵩等疏言徐邳等十七州縣連被水

國朝典彙卷九十九
求
患乞命戶部給發餘鹽銀兩及徐淮等倉存留糧米選
差大臣出賑上命發淮徐倉米麥四萬石運司餘鹽
銀五萬兩遣刑部侍郎吳鵬往賑之

給事中魏元吉等疏救荒四策一補積欠請令通倉收粟
以給薊鎮薊鎮發銀以給遼東彼此完補各從水陸之
便一革濫稅請疏通山海關往來商貨罷勿復征一開
礦禁請召集各處礦夫聽其從便採銀以四分輸官備
賑濟之用一議引銀每引請量減舊值止稅銀二萬發
管糧郎中補給軍士草價部議允行

十月直隸河南山東大水吏部侍郎程文德言水災異常
言官屢奏持議未見歸一臣以今日內帑不必發大臣
不必往宣諭令各州縣自爲賑給聽其便宜處置凡官
帑公廩贖納勸借苟可濟民一不限制又近日戶部申
明開納事例亦許就本地上納卽粟麥黍菽凡可救饑
者得輸官計直請劄授官仍登計全活之數定爲等則
以憑黜陟卽撫按守巡賢否亦以是稽之報可

上問大學士嚴嵩民多無食若何嵩請以太倉米數萬石
平價發糶仍禁市行不許多買轉賣以索高價又言民
有身無一錢者仍坐斃道路請於十萬石內以八萬石
糶濟二萬石委官運赴城外每早招集饑民人給一升

上曰朕意正如此令以六分出糶四分給貧苦者

三十三年四月都城內外大疫 上諭禮部曰疫大甚死

亡塞道朕為之惻然其令太醫院發藥戶部同錦衣衛

以米五千煮粥療濟副朕好生之意死者官給席藁令

所在居民收瘞之詔下貧民全活甚衆遠方聞者爭求

就食戶部尚書方鈍以人多食少請多發米以賑報可

三十四年六月 上諭戶部曰朕聞宣大二鎮米價騰貴

其北直隸山東河南麥熟之處或可做昔人平準法以

濟民饑者當急計行

三十七年三月遼東大饑人相食詔發太倉庫銀五萬兩

補給三十六年以後軍餉已 上意未慊詔再發戶兵

工三部庫銀一萬兩命御史吉澄往賑未幾又以巡按

御史周斯盛之奏復發二萬兩趣澄疾馳至鎮給之

三十八年九月兩淮巡鹽御史李廷龍言兩淮三十場分

災傷異常應賑貧竈共六萬五千六百餘兩乞支庫貯

挑河銀一萬九千餘兩酌量賑濟從之

總督薊遼尚書楊博言遼東災傷已極召糶甚艱乞將新

運通倉錢糧停泊天津者暫借六七萬石由天津水運

薊州以達山海關僱脚陸運至各地方給散其漕糧則

以賑濟銀兩糶還戶部議許之

十二月巡按浙江御史凌儒言浙東杜瀆長亭等八場竊
丁近遭倭患乞將運司沙地銀五百七十餘兩在倉稻
穀七千六百七十餘石量行賑濟戶部議覆報可

三十九年三月時近京地方饑荒民流入京者甚衆無所
得食上憫念之令部臣詳議事宜以聞戶部議上五
事一議賑流聚言宜令戶部錦衣衛各簡其屬十人與
三五城御史悉錄見在流民發太倉米萬石人日給一升
至五月終止五月後係百里外者人給五升遠者以次
遞加至二斗止使還舊業二議濟病弱言凡就賑饑民
不能赴官者令所在富戶爲糜食之太醫院仍給藥

調治三議處游惰言凡年力少壯者取其年籍令工部
酌議僱覓給與工價勿令轉徙四議處近民如昌平通
州諸處宜於太倉通倉各發米五百石付所司分賑五
議處遠民宜移咨順天保定巡撫凡應賑之處定擬多
寡分數馳報本部請發太倉銀折米充賑上俱從之
四十年四月上命發米粥藥餌給京師流民已聞有司
給散非法諭戶部曰朕聞湯藥不對症且饑餒之腸反
傷生又給米時貧弱者無濟有力者濫與違上行私甚
非朕意是執事者之過也可傳示令小民知非朕下令
初意部言聖慈下賑惠之令雖全活甚衆但聞風絡繹

難繼群聚日久蒸爲疫癘宜於近京要路委廉幹官約期分給使入來者得食不必入京久著者藉資得還故土則勢分而惠溥矣 上是其言復諭輔臣曰近各處饑民來京數多皆因有司坐視不能賑卹所致殊爲曠職令戶部移文各撫按督率守令招集安撫毋事虛文若仍前玩愒治罪不赦再發京倉米四千石內庫錢三百萬以給貧民歸費仍視地里遠近爲多寡務稱朕意四十四年時各處饑饉京師餓殍尤衆加以疫癘 上欲作粥施餌以救災疾大學士徐階言粥餌之施有名無益况給散無紀則強壯者幸而關領老羸者多致踐踏而亾 上曰二事俱增民病出粟又無多積衆災難免矣階曰往歲出粟不過三二千石太倉尚足辦此但京師出粟四方貧民間知多有匍匐至者至則施畢空歸顛殞道路矣宜命戶部出粟止給京民其在外者行令撫按一體賑給勿得來京庶全活爲多從之

隆慶三年五月大水時江以南霪雨三月不絕田禾漂溺所司俱以蠲賑請而淮揚徐州俱被水患守臣奏請發運司餘銀三萬鈔關船料三萬八百餘鹽院贖贖萬八千六百餘河道三千三百餘司府州縣贖贖二萬五千餘兼積貯勸借買穀十五萬石截漕三萬石以賑之

上諭戶部曰朕閱河道都御史翁大立奏報水災異常百姓困苦朕甚憫之爾戶部發太倉銀二萬兩選差司官一員齎去同大立先儘災重去處亟行賑濟務使民沾實惠其餘被災地方行各該撫按一體設法賑恤仍查災傷分數酌量蠲免以副朕軫念元元之意

永寧義士王潔胥瓚捐金鬻產以賑救饑貧修葺城堡巡按御史王時舉疏聞請建坊表揚以勵薄俗從之

以霖雨壞民廬舍令五城御史以房號錢巡按御史以賍銀分賑之貧者戶給銀五錢次三錢仍諭左都御史王廷等督御史嚴加稽察務使貧民得沾實惠

終

附恤孤貧

國初令天下置養濟院以處孤貧殘疾無依者

洪武元年 上謂中書省曰中原兵難之後老稚之孤貧者多有失所宜遣人賑恤之省臣以國用不足爲對上曰得天下者得民心也夫老者民之父母幼者民之子弟恤其老則天下之爲子者悅恤其幼則天下之爲父母者悅天下之老幼咸悅矣其心有不歸者寡矣苟置其困窮而不之恤民將憮然曰惡在其爲我也故周窮乏者不患無餘財惟患無是心能推是心何憂不足今日之務此最爲先宜速行之

三年命民間立義塚仍禁焚尸若貧無地者所在官司擇近城寬閒之地立爲義塚

上諭中書省曰往者四方爭鬪民不得其死者多矣中原草莽遺骸遍野朕聞之惻然於心宜遣人循歷水陸悉收瘞之省臣曰陛下仁及枯骨聖王之善政也上曰先王之世人得以養生送死者上得其道下無大闕元季政荒民困干戈加以饑饉相尋故死亾者衆朕荷天命爲億兆主顧茲失所者豈忍使之暴露哉

八年正月命中書省行天下郡縣訪窮民無告者月給衣糧無所依者給之屋舍諭曰天下一家民猶一體有不獲其所者當思所以安養之昔吾在民間目擊其困餓寡孤獨饑寒困踣之徒常自厭生恨不卽死如此者展轉於溝壑可坐而待也吾遇亂離此心常惻然故躬提師旅誓清四海以同吾一家之安今代天理物已十餘年若天下之民有流離失所者非惟昧朕之初志於代天之工亦不能盡也爾等爲吾輔相當體朕懷不可使有一夫之不獲也

永樂十年四月江西安仁知縣曹潤奏請復設惠民藥局養濟院從之

二十二年 仁宗諭禮部戒約有司謹視養濟院施實惠

母致失所

宣德元年五月淳化縣丞吳整言自京師通州至河南兩岸多漂流骸骨乞官爲瘞之上諭禮部尚書呂震曰文王仁及朽骨丞所言當從之其卽施行勿緩

諭順天府尹王驥取殘疾無依者入養濟院毋令失所十年六月辦事官呂中言各處墳墓有係忠臣孝子賢人烈士今被盜發掘破棺取物有子孫者卽爲掩葬無者至今暴露英宗以先王仁及朽骨葬殍掩骼具有令典卽令有司盡與掩埋仍嚴禁以止發掘

正統九年閏七月諭都察院曰近聞各處軍民往往發人墳塚爾等職總風紀其嚴行各處巡按御史按察司督令各司府州縣官凡境內但有暴骨在田野道路者悉令所在里老人等卽時掩瘞仍嚴諭軍民不許再犯違者罪之

景泰七年光祿寺丞王鍾奏東安門外夾道中日有無告窮民扶老携幼跪拜呼喚乞錢一城之內四關之中無處無之今將寒冱必有凍餓而死者乞勅戶部等衙門勘審人給布衣一身粟米一斛審其原籍有親戚者待明年春暖沿途給與口糧遞送還家其無親戚者在京以沒官房給之仍行天下有司遇有窮民一體矜恤命

戶部議行之

天順元年五月 上諭戶部曰京城貧窶無倚之人行乞於市誠可憫恤其令順天府於大興宛平二縣各設養濟院一所收之卽今暫於順便寺觀內京倉支米煮飯日給二殮噐皿柴薪蔬菜之屬從府縣措辦有病者撥醫調治病故者給以棺木務使鰥寡孤獨得沾實惠二年閏二月勅鎮守懷來等處都督姚貴分遣人收瘞土木南山河南河北一路陣亡官軍骸骨

成化元年禮部尚書姚夔奏今京城街市多有疲癯殘疾之人扶老携幼呻吟悲號亦足以干天地之和而四夷使臣見之將爲所議請勅巡街御史督五城兵馬拘審道途乞丐殘疾之人有家者責其親隣收管無家者收拾養濟院照例時給薪米其外來者亦暫收之候天道和暖量與行糧送還原籍有司一體存恤務令得所上可其奏曰無問老幼男女有無家及外來者順天府尹盡數收入養濟院記名設法養贍毋令失所

四年五月給事中陳鶴言京城內殘廢無告之徒朝暮哀號排門乞食往往凍餓死於道路乞勅有司添設養濟院給以粟布刑部主事薛祺亦言之 上命府尹收入養濟院外來者給口糧程送還鄉官司存恤毋令失所

七年四月戶部奏近日饑民行乞於道多疲不能支相仆以死已令順天府二縣委官收恤其軍餘匠役各送所司給親收養所親不能贍給宐收入養濟院賑恤其遠方流移如例給糧發遣復業死無歸者葬之詔悉議行五月詔京城外置漏澤園

正德十一年詔都城內外各寺觀寄放齋牒有主者立限收葬無主者隨地瘞之仍諭兩京各布政司如例舉行嘉靖五年正月時京師饑民多命養濟院月給米蠟燭旂竿二寺日給食以惠貧民

七年先是養濟院收養孤老有詐稱貧戶濫給衣糧有故填空籍附之實在者窮民或轉死不收而奸利至以起家肥厚於是戶部主事王松建議請遣部屬二員會同五城御史嚴督所屬查係孤老無依者給與衣糧其間逃亡之數一一籍記以便豁免而放糧有司仍案錄見在實唱名給領不得令甲頭總關致有乾沒從之

十一年五月巡按直隸御史徐汝奎上言大同地方達賊入境陝西延綏諸處重被災傷軍民多苦死乞請立義塚埋尸骨仍乞遣祀部覆如議上令依擬行

二十四年八月諭禮部朕思京城九門地大人衆多有死亡喪貧難不能葬者或有四方客死不能歸者暴露屍體

國朝典彙卷一百
朕甚憫焉五城御史其專率各該官役以義地收瘞之
三十三年十月 上謂大學士嚴嵩曰我思饑民必有斃
於道路者暴露骸骨朕所不忍宜有以處之乃勅令在
京行五城御史在外行撫按各督有司查視掩埋以稱
朕不忍暴露之意

三十八年二月 上諭戶部朕聞近日貧民凍餓死者甚
衆其卽發米萬石爲粥食之苑亾暴骨者五城御史督
令地方掩瘞諭錦衣衛亦如之

國朝典彙卷一百

都察院右僉都御史臣徐學聚 編輯

戶部 十四

蠲免

吳元年 太祖令曰予本布衣因天下大亂集衆渡江撫
定江左十有三年中原之民流離顛頓尚無所歸吾乃
積粟控弦於江左坐視民之塗炭而莫之救豈不負上
帝好生之德有愧古聖人愛民之心哉今特命中書省
凡徐濠泗壽邳東海安東襄陽安陸郡及今後新附土

地人民桑麻穀粟稅糧徭役令有司蠲免三年

諭中書省曰予嘗親歷田野見人民凋弊土地荒蕪蓋因久困兵革生息未遂且如太平應天諸郡及吾渡江開割之地供億先勞之民其有租稅宜與量免少甦民力省臣傅巖對曰恤民王者之善政主上念之及此真饗政施仁之本也上因嘆曰吾昔在軍中嘗乏糧空腹出戰歸得一食雖甚粗糲食之甚甘今尊居民上飲食豐美心未嘗忘之况吾民居於田野所業有限而又常供百出豈不重困於是免太平府租賦二年應天鎮江等處租賦一年

洪武元年詔免山東郡縣租稅博興等縣民高翼等五十
二人來謝恩命禮部各給道里費遣之仍止其未來者
三年三月免南畿河南各省稅糧詔曰應天太平鎮江寧
國廣德滁州和州朕興師渡江時資此數郡以充國用
致平定四方朕念其勤勞未嘗忘之仍免今年夏秋稅
糧其徽州金衢嚴廣信池饒廬等郡以次歸附供億軍
國之需亦甚煩勞河南北平近入版圖重念其民久罹
兵革疲困爲甚山東河南壤地相接宜優恤其民使買
遷有無相資爲生今年三處租稅再行蠲免以甦民力
五月免蘇州逋負秋糧三十萬五千八百石先是戶部奏

蘇州多逋稅其官吏當論如法 上曰蘇州歸附之初軍府之用多賴其力今所逋稅積二年不償民困可知若逮其官必責之於民民畏刑罰必傾貲以輸官如是而欲民生之遂不可得矣其悉免之

十一年二月 上謂中書省曰人君視天下猶一家一家之內一人不安則事爲之廢天下之廣尺土不寧則君爲之憂近者雷州府海康遂溪二縣田地爲潮水所漬斥鹵不收租稅從何而出其令有司覈實免之

十三年三月命戶部減蘇松嘉湖四府重租糧額 上曰天地生物所以養民上之取民不可盡其利也夫民猶樹也樹利土以生民資食以養養民而盡其利猶種樹而去其土也比年蘇松各郡之民衣食不給皆爲重租所困民困於重租而官不知恤是重賦而輕人亦猶虞人反裘而負薪徒惜其毛不知皮盡而毛無所傳豈所以養民哉其賦之重者宜悉減之

十六年五月免應天太平鎮江寧國廣德五郡稅糧命戶部諭其民曰五郡爲興王之地其民助朕居多故數免稅以酬其勞敢有侵漁者必置於法

永樂元年六月命侍郎李文郁往佐尚書夏原吉相度嘉湖蘇松水田量免今年租稅

三年正月 上諭戶部曰數年用兵北京順天永平保定供給特勞非休息二三年不能復舊可免三府田租

四年四月順天府老人三十餘人謝優免稅糧 上曰耆

老遠來不易光祿與酒食禮科與道費遣歸諭之曰往者連年軍旅北方之民供給勞困朕未嘗忘之比歲農種如何民力稍復舊否諸老人叩首曰仰賴 陛下鴻

恩蘇息調養漸復舊矣 上曰朕久居北京心念之屢

欲來但念民力未復恐重困之今若等歸諭勉鄉人子弟勤力務本相勸爲善毋爲不善慚汝耆老之職復叩首謝 上顧侍臣曰今北方之民如人重病初起善調

理之庶幾可安不然病愈重朕所以夙夜拳拳也

六年五月詔諭北京諸司文武群臣北京軍民備歷艱苦勞瘁未蘇自今北京諸郡不急之務及諸買辦悉行停止其民流移未歸者免賦役二年

七年解州教諭白威言安邑民饑流徙吏不知恤旱傷田稼而科徵不已其稅糧乞折收鈔帛 上曰守令民之父母艱難困苦而不知恤又重以徵歛豈爲民父母之道命戶部停徵稅糧令御史治縣官罪威爲安邑知縣八年詔濟寧至北京水陸輸運軍需之民免差役一年

十年六月浙江按察使周新言永樂九年湖州府所屬被

霖潦盡沒窪田負糧十六萬二千四百餘石有司不與分豁民被迫責日就逃亡命戶部亟遣人覆實蠲免十一月給事中胡濙言陝西邇年積草沓爛今作侵欺追賠民甚不堪上命戶部賑濟虧折馬草悉免追

通政趙居住奏蘇州逃軍言水澇傷禾乞免秋糧及奸民決隄壞禾冀免稅糧俱請罪之上日言水澇者果逃軍可止坐逃軍罪其言決隄車水求免稅糧恐無是理蓋與其勞力決隄車水曷若勞力治田田中所入十分以一分入官九分入己豈肯以一廢九自愛饑餒聊殆非人情且前時浙江按察司亦嘗言浙西水澇居住不恤民隱今此言未可信仍遣官往視之

十七年上聞山東高密逃民復業者有司徵其累年所負糧芻因謂戶部曰往古之民死徙無出鄉安於王政也後世之民賦役均平衣食有餘亦豈至於逃徙比來撫綏不得人但有科差不論貧富一槩煩擾致耕穫失時衣食不給不得已乃至逃亡及其復業田地荒蕪廬舍蕩然農具種子皆無所出政宜調卹乃復徵其逋負窮民如此豈堪存活自今逃民復業者積年所負糧芻悉與蠲免

十九年四月戶部尚書夏原吉言愛民所以敬天蠲逋負

芻糧採辦金銀程課優恤流移以回天意從之
二十二年九月黃河汎溢傷祥符陳留鄆陵太康陽武原
武諸縣禾稼勅免今年稅糧馬草仍命右都御史王彰
往鎮軍民諭之曰卿任朝廷耳目之寄且河南鄉邦下
情鬱不上達久矣凡有可以利民安軍者悉具奏來各
府州縣亦須周歷諮訪庶幾得民之情

洪熙元年山東布政司言登萊諸郡今歲雨水傷麥其累
歲所逋稅宜令民以他物代輸命戶部議所以寬貸之
者戶部以國用不足爲言上曰軍民一體民貧不可
不恤宜從所言自永樂二十年以前所逋稅悉蠲之二
十一年稅令以鈔代輸

上聞淮安徐州山東民饑而有司徵稅方急於是坐西角
門召大學士楊士奇等命草詔悉免今年夏稅及秋糧
之半官買物料一切停罷士奇對曰斯事可令戶部工
部與聞上曰救民之窮當如救焚拯溺不可遲疑有
司慮國用不足必持不決之意卿等姑勿言命內官具
楮筆令士奇等就西角樓書詔覽畢卽命用璽已遣使
賫行顧士奇曰今可語戶部工部朕悉免之矣左右或
言地千餘里其間未必盡無收亦宜有分別庶不濫恩
曰恤民寧過厚爲天下主可與民寸寸計較耶

宣德二年 上御便殿問侍臣曰聞朝廷下寬恤之令或為有司沮格者誠有之乎侍臣對曰亦間有之 上曰治天下以信為本朕每出一詔令必預度可行可守而後發不然徒失信於民豈為君之道為臣輔君理民以信義為要君欲施仁而臣沮格於下不忠孰大焉

三年永平及山西民張簡等自虜中逸歸 上謂戶部曰此皆身陷虜中數年艱苦多矣今獲來歸可憫也其令充御馬監勇士給衣糧以優之仍免原籍差役著為令 五年二月 上御齋宮召大學士楊士奇論曰吾欲下寬恤之令今獨與爾商之免災傷稅糧當是首事聞民間

虧欠畜馬騾驢所司追價甚迫民計無出亦甚艱難部官坐視而不言對曰 陛下聖念及此生民之幸各部惟知督責下民以供公家而不顧民心之離故一切民瘼蔽不以聞今所當寬恤者殆非止兩事 上曰汝所知者具言之對曰百姓積年負欠薪芻及採辦買辦之物此當寬貸各處官田起科不一而租額皆重細民困乏郡縣不以聞蘇州尤甚此當量與減除部符下郡縣採辦買辦諸物但槩派徵更與分別出產與否非出產處百姓數十倍價買納請戒約該部今後凡物只派有產之處不許一槩均派苦民年來刑獄冤濫者多感召

旱澇恐由於此請飭戒法司敦用平恕務求情實今工匠之弊尤多四方遠近每戶不問幾丁悉徵在京役於工者什不一二餘皆爲所管之人私役不得營生嗟怨溢路請命官巡察究治及分豁戶丁之半放回單丁者免老病無餘丁者除籍又有平民本非業匠爲怨家誣引者當審實除豁南方運糧至此人力甚艱而倉廩無關防姦人盜竊動輒數萬請命風憲關防巡察 上歎曰朝廷任六卿但知苛責下民而不能察奸情弊有愧厚祿矣爾所陳有益於朕有益於民此皆應行命卽草

勅明日頒行

六年三月巡撫侍郎周忱請蠲松江被水淪沒官民田糧又官田古額科糧太重乞依民田起科戶部尚書郭資等以忱欲變亂成法請罪之 上曰忱職專糧事此亦其所當言朝議以爲不可則止何爲遽欲罪之卿等大 臣必欲塞言路乎忱不可罪

七年 上召大學士楊士奇至文華殿日憶五年二月爾南齋宮論寬恤事今兩閱歲矣民事不又有可恤者乎對曰誠有之只五年官田減租額一事聖恩已下璽書戶部格而不行至今仍舊額追徵小民含冤不已上怒曰戶部可罪也對曰此循習之奸永樂末年多如

此往年高煦反以夏原吉爲奸臣之首正指此事爲說
上怒稍解曰今欲再下勅寬恤必舉此爲第一事却於
未增云中外該管官司不許故違 上又曰如再格不
行朕必罪之不恕汝試言今日之事當寬恤者士奇對
所在官司不能容逃民則相結爲非願得恩旨凡逃民
願歸鄉者令郡縣用心撫恤優免差徭不願歸者聽於
所在附籍爲民官給空閑田廬處之免差役二年又言
各處課程先因鈔法不通加倍其額徵納蓋一時之權
今鈔頗流通宜量減倍徵之額又言天下課程皆納鈔
惟湖廣廣西浙江商稅漁課舊例皆納銀民不勝弊請
裁爲一例 上嘉納之士奇請更得一人論此事 上
曰胡濙謹厚汝與之密議就錄稿進來於是士奇等議
增十數事通錄進呈 上悅

三月朔頒寬恤詔於天下

上退朝御左順門謂尚書胡濙等曰朕昨以官田賦重百
姓苦之詔減十之三以蘇民力嘗聞外間有言朝廷每
下詔蠲租戶部皆不行甚者文移戒約有司有勿以詔
書爲辭之語若然則是廢格詔令壅遏恩澤其咎若何
今減租之令務在必行卿等當體朕意濙等皆頓首謝
御史彭勗言郡縣守令凡遇水旱災傷慮勘覆之勞匿不

以聞間有上陳者部司又以國用不敷爲停免糧稅以致凍餒貧困流離轉徙鳳陽潁川一帶逃民動以萬計皆真定保定山東諸處之民比因累歲荒歉稅糧孳牧逋負者多不能賠納有司不量民情又且責償遠年賑濟糧米若不轉徙何以自存乞廷議凡天下旱澇之處一應應徵錢糧鹽鈔并孳牧雜辦賑濟倉糧悉皆停免仍取勘缺食之人不問土著流移驗口賑濟其守令功績必考其戶口增減以爲殿最 上從其言命有司之行

正統四年三月以寬恤詔天下

天順四年秋天下大水江南北尤甚田盡淹沒時 上意

明察凡事臣下莫敢發端閣臣李賢一日因召問畢從

容言曰臣聞今年水災甚大數十年來未有百姓不能

存活 上曰奈何賢曰若非大施恩典安得蘇 上曰

何如則可賢曰宜下詔免徵糧草 上曰固可但詔非

一二條可行莫若以旨意與戶部行於天下賢曰如此

尤善於是令被災州縣申報撫按災重者全免稍重者

免半輕者免三分已而天下奏水災無虛日通政司奏

對無日不有 上初以賢言或過至是見其實

五年六月 上以人民被災猶未甦息而又調兵征西乃

布寬恤之典凡花木鳥獸粟版之類及追馬清匠刷卷

國朝典彙卷一百一十一
益
等事悉皆停止歇採柴一年省銀三十萬兩

成化三年江西巡按御史趙啟言所屬旱傷特甚不能聊生乞勅戶部定議請將兌軍米容留本布政司六十九縣倉分上納以備賑濟各衛所運糧官軍遇此凶荒宜暫休息每年徵收戶口鹽鈔多被包攬刁徒賄囑吏胥同里甲下鄉逼迫貧民子女牛畜田地房屋准折變賣請將今年鹽鈔通行停免戶部覆奏俱從之

二十一年正月以流火星變寬恤天下舊年糧米未徵者盡行蠲免已徵者糧米留本處賑濟坐派物料未徵者盡免已徵物料准作次年之數不許朦朧再徵

弘治三年戶部以水旱災請免直隸等處夏麥秋糧上

曰國賦固有定法然歲有凶豐凶歲義當損上益下若必欲一槩取盈倉廩則實矣如病民何奏中所擬悉從之仍諭有司使貧民各沾實惠

五年正月右都御史白昂言天下奏報災荒多不實宜令御史覈實天下田數高下之則藏之官旱則蠲高水則蠲低庶其弊可絕上嘉納之

正德四年二月南京守臣以修省請停徵科罷工役一成造上用弓箭等物原差太監每歲供給下程二千餘兩今事完宜趣令回京一織造段疋價萬一千六百餘兩

宜緩解其半一修御馬監等處卽龍鳳殿物價三千三百有奇又修盛甲鑄錢熟銅宜以徵在官者輸部餘俟豐年補之一供應織造太監下程工食歲費銀五千四百有奇宜以應天府庫貯無礙銀給之以蘇徵派之苦上曰南京根本重地人罹災重人民窘諸造作費用數多無從出辦情實可憫所差太監令速回毋得久滯物價物料未徵者宜暫停免待豐年補還其供給下程工食何至歲用數千守備官可備覈其數所司亦何可分外承奉自後無額式者其盡革之毋困吾民

六年三月太監張永傳旨近來各處盜賊縱橫多因水旱衣食艱難各有司不能賑恤或又稱科歛而侵尅之及朝廷下詔蠲免錢糧乃將虛文起解之數捏作已徵或將已徵捏作未徵重復徵解以致小民冤苦無伸流離失業相誘爲非苟逃性命日復一日轉漸增多念此良民皆吾赤子情非得已實可哀憐已累降勅旨申明戒約誠恐安於故習不改前非徒事虛文民不沾惠都察院卽出榜文分給直隸山東河南四川江西湖廣陝西福建兩廣用兵地方令各鎮巡等官行各府州縣遞相謄刺張掛曉諭備查正德五年分正額歲糧草料之外一應歲辦雜派軍需諸物料實係已徵在官者如數起

解其小民拖欠未徵及有司畏懼期限虛報已徵之數悉皆蠲免其被賊殘破處所并正額糧草通免一年以甦民困虛報官員免其查究不許再犯

七年正月太監張永傳旨山東等處盜賊殘破州縣累蠲稅糧而有司廢格不行以致上無實惠民罹困苦令戶部議處以聞戶部覆議謂兵荒山東爲甚河南南北直隸次之宜會計經費以定減免之數一京儲凡已徵未解者山東卽留本處備用河南南北直隸許折輕齎解部召商上納其未徵係內府供應不容免者則於已徵銀內通融補解其他雜糧俱免各衙門應用等項先查

存積盡支不足則於太倉及五場給之一邊餉山東河南北直隸原派各邊及畿郡倉庫錢穀未徵者亦俱免已徵未解者山東亦留本處河南南北直隸亦許輕齎類解其各邊糧草將正德五六年兩淮鹽課於宣府六十萬引遼東三十萬引召商上納賊未殘破州縣已徵者則以補內府不充之數山海等關許於附近存積多處通融借用或查各庫積銀折放一祿俸各處存留糧數以供各王府及司府衛所州縣祿俸宜以賊未殘破州縣原派并被賊州縣已徵未解者量派本處以給之又各處有雜辦果品等項及禮兵工牲口口柴薪物料

俱請令各部會計減免從之

十六年五月給事中吳巖言工部前奏差主事舒貢馮珠王承恩分往各省催徵宿逋今詔旨有取回戶工二部催官員之條各處民力既竭卽有逋負爲詔赦所不及者亦宜緩徵以寬民力貢等乞罷勿遣從之

嘉靖九年 上因災荒勅諭都察院言朕因民窮屢有蠲貸之命聞所在官司仍徵又催之者夫官免之意在裕民却乃如是論財則官民兩不獲上權虛名下受重困法令俱亾着議處考究其有欺隱及不遵的從重治罪

隆慶二年二月 上諭戶部曰朕躬奉春祀式弘先德以惠民生所過地方其量免本年田租戶部尚書馬森等請覆昌平州宛平大興二縣地方凡建設行宮及屯營軍馬開除馳道者免十分之五所過者免十分之三四年薊遼總督譚綸陳言內一款言今民貧吏慢而蠲征之令太數夫良民奉法而供賦以爲常敝民梗化而逋賦亦以爲常請自今地方非有重災不得議免其悖頑多逋者有司嚴法繩之不得寬貸則良民不致獨累而敝民亦知畏法矣

都察院右僉都御史 臣徐學聚 編輯
 吏科給事 中臣許譽卿訂正
 戶部 十五
 倉儲 附庫貯
 洪武二年八月詔在京軍儲倉增設京畿漕運司官專督其事
 十四年正月近臣有言國家當理財以紓國用者 上曰
 天地生財以養民故為君者當以養民為務夫節浮費

國朝典彙卷一百一

都察院右僉都御史 臣徐學聚 編輯

吏科給事 中臣許譽卿訂正

戶部 十五

倉儲 附庫貯

洪武二年八月詔在京軍儲倉增設京畿漕運司官專督其事

十四年正月近臣有言國家當理財以紓國用者 上曰 天地生財以養民故為君者當以養民為務夫節浮費

薄稅歛猶恐損人况重爲徵歛乎近臣復言自天子至於庶人未有不儲財而能爲國家者上曰人君儲財與庶人不同庶人爲一家計則積財於一家人君爲天下主則散財於天下豈可塞民之養而陰奪其利乎昔漢武帝用東郭咸陽孔僅之徒博民取利海內苦之宋神宗用王安石理財小人競進天下騷然此可爲戒有子曰百姓不足君孰與足此言何謂也言者愧悚

二十一年 上謂戶部曰曩者山東歲歉民饑蓋素無蓄積以備不虞故也今歲山東夏麥甚豐秋稼亦茂爾戶部可運鈔二百萬貫往各府州縣預備糧儲如一縣則於境內定爲四所於居民叢集之處置倉榜示民家有餘粟願易鈔者許運赴倉交納依時價償其直官儲粟而扁鑰之就令富民守視若遇凶歲則開倉賑給庶幾民無饑餓之患

永樂八年九月福建右布政張拱言福建官軍俸糧倉儲有餘有司復令民海運舊者不免腐爛新者無倉收受乞將今年秋糧折收布鈔從之

十月戶部言崑山縣日照縣各貸預備倉糧拯饑民以累歲水災不能償乞折輸鈔 皇太子從之

十一月戶部會議直隸郡縣官租旣重又令遠輸誠爲勞

費宜令輸納旁近官倉 皇太子從之

十年五月四川副使周南言涪州并長壽縣見積倉糧五萬餘石約可支十年今貴州各衛所俸糧俱於重慶民倉支給如將涪州長壽倉新舊兼支可免朽腐從之
陝西秦州民張源言鞏昌臨洮等府歲稅運甘州相距二千餘里皆陸行甚艱乞收儲本處倉遇農隙令旁近州縣民運輸蘭縣倉自蘭縣至甘州每五十里設站一或役刑徒或令官軍轉輸庶少蘇民力從之

二十二年天津衛倉災焚糧數十萬石御史劾王典者侵盜故縱火自蓋大理寺卿虞謙白其寃 仁宗命減論

洪熙元年六月無爲州奏州民艱食已給預備倉糧濟之上諭戶部尚書夏原吉曰預備倉儲正爲百姓比之前代常平最爲良法若處處收積完備雖有水旱災傷百姓可無饑窘此 太祖皇帝良法美意卿宜徧行天下申明舊典務存實惠勿事虛文

宣德三年四月給事中宋徵言洪武中郡縣所糴預備倉糧近皆廢弛宜下郡縣修倉徵收以備荒歉 上謂戶部曰此 太祖備荒良策當百世行之今廢弛如此皆有司之過宜卽遣官巡視整理有慢令及欺弊者罪之
七年六月巡按湖廣御史朱鑑言洪武間各府州縣皆置

東西南北四倉以貯官穀多者萬餘石少者四五千石
倉設富民守之遇有水旱饑饉以貸貧民今各處有司
以爲不急之務倉廩廢弛贖穀罰金掩爲已有深負朝
廷仁民之意乞令府州縣修倉廩謹儲積給貸以時仍
令布按二司巡按御史巡察違者罪之 上諭戶部曰
此祖宗良法美意比由守令不得人遂致廢弛爾部亦
豈能無過其如御史言違者從按察司監察御史劾奏
八年巡撫南直隸侍郎周忱奏定濟農倉之法南畿諸郡
蘇州田稅最重而松江常州次之貧民輸官及耕作多
舉債於富家而倍納其息至於傾家產鬻子女不足以

償於是民益逃亾而租稅虧壬子秋諸郡歲稔會朝廷
命下許以官鈔平糴且勸借儲積以待賑忱乃與蘇松
常知府况鍾趙豫莫愚協謀而力行之蘇得米三十萬
石松常有差分貯於各縣名其倉曰濟農會江南旱盡
發猶不足贍忱復思廣爲之備先是各府秋糧當輸者
糧長里胥多厚取於民而不卽輸官逃負者累歲忱欲
盡革其弊乃立法於水次置場擇人總收而發運焉細
民徑自送場不入里胥之手視舊所減三之一又三府
當運糧一百萬石貯南京倉以給北京軍職月俸計其
耗費每用六斗致一石忱與鍾等謀曰彼能於南京受

國朝典彙卷一百一十八
俸獨不可受於此乎若來此給之既免勞民且省費六十萬石以入濟農倉農無患矣鍾等皆曰善遂請於朝從之而蘇州得米四十餘萬石益以各場儲積之贏及前平糴所儲凡六十餘萬有奇松常二郡次之忱曰是不獨濟農凡運輸有欠失者亦於此給借陪納秋成如數還官若民夫修圩岸濬河道有乏食者計口給之如是則免舉債以利兼并之豪農民無失所者田畝治賦稅足矣是冬朝京具以聞朝廷皆從之於是令諸縣各廣濟衆倉貯焉擇縣官之廉公有威與民之賢者掌其籍司其出納每歲插蒔之際於中下二等戶內驗其種

田多寡每家給與二石一齊給之秋成抵斗還官後遇大旱令諸郡大發濟農米以賑貸而民不知饑

正統四年大學士楊士奇等言 高皇帝篤意養民備荒有制天下郡縣悉出官鈔糴穀貯倉以時散歛又相其地開濬陂塘修築圩壩以備水旱小大之民各安其業歲久弊滋豪猾侵漁穀盡倉毀凡諸水利亦多湮廢或被占奪稍遇凶荒民無所賴請擇遣京官廉幹者往督有司凡豐稔州縣各出庫銀平糴儲以備荒陂塘圩壩皆令修復其實奏聞郡縣官以此舉廢爲殿最風憲官巡歷各務稽考仍有欺蔽怠廢者具奏罪之 上曰此

國朝典彙卷一百一十八 倉儲 五
祖宗良法美意也命戶部急行之

五年正月令六部都察院推選屬官領勅前詣兩畿及各省府州縣立預備倉發所在庫銀糴糧貯之軍民中有能出粟以佐官者授以散官旌其門

山東樂陵縣築倉起土得白金九錠重三百九十餘兩有司以聞 上命易糧貯倉以賑貧乏

巡撫左侍郎于謙言臣奉命總督河南山西二處預備糧儲今在倉各以數百萬計臣欲於每歲三月初令州縣記其缺食之家申達布按二司斟酌得宜方令支給其所給者大口月三斗小口半之至五月蠶麥既收隨卽

任支仍將所給之數申報上司及戶部候秋成抵斗償官歲終仍報所償之數果有貧乏及篤廢老疾當以其次者官爲設法補完毋損原數其放支之序先菽次藿秫次黍麥次米稻後先有倫毋致紅腐州縣官有能設法經營使新陳相易不致沓壞者聽當滿而預備糧儲未完者不得離任仍令風憲官稽考伺察從之

用大學士楊士奇言遣侍郎何文淵等往各省直修備荒之政賜之勅條列合行事宜一見今官司收貯諸色課程并贓罰等項鈔貫雜物可以貨賣者不拘稻穀米粟二麥之類貿易儲積竝須照依時值不許虧官損民耗

州縣所積預備穀粟須計民多寡約量足以備用如本處官庫見儲鈔物不敷於本府官庫或本布政司官庫支買如又不敷移文戶部奏聞處置一凡丁多田廣及富實良善之家情愿出穀粟於官以備賑貸者悉與收受仍具姓名數目奏聞一糴糧在倉須立簿籍二扇備書所積之數用州縣印鈐記一在州縣收掌一付看倉之人但遇饑荒百姓艱窘即便賑貸並須州縣官一員躬親監支不許看倉之人擅放二處簿籍放支之後並將實數具申戶部所請看倉須選有行檢老人富戶就兼收支不許濫設一洪武年間所置預備倉糧多由州

縣不得其人視為泛常全不留意以致土豪奸民盜用穀粟捏作死絕逃亾人戶借用虛寫簿籍為照是以倉無顆粒之儲甚至拆毀倉屋間遇饑荒民無所賴深負祖宗仁民之心爾等於所屬府州縣並須親歷查勘前項官倉糧儲原數實在幾何百姓借用未還虧折幾何務要根究的實着落前後經手人戶供報追價不許聽其詭詐指板死絕逃亾人戶搪塞遮掩追完之後令照例納米贖罪若限外不完者毋論赦前後械赴京師發戍遼東邊衛一比先所建預備倉廩或為豪民所據責令還官或年深毀壞量加修葺其倒塌不存者官為起

蓋如本處有空閑官房許令拆用竝須完固可以經久
一 所過州縣倉廩穀粟充實陂塘隄岸完整者必其正
佐之官得人若有空虛廢壞等項其正佐之官必不得
人悉具名奏聞如或貪酷虐民驗有實跡即便拏問一
今後府州縣官考滿赴吏部者竝須開報預備官倉所
儲實數及修築過陂塘隄岸等項吏部行諛部查考虛
實以憑黜陟事完回京仍將所備穀粟及所修陂塘圩
岸閘壩備細造冊具奏遇有興利除害之事難以處置
者具奏來聞

七年十一月南京戶部侍郎張鳳言南京根本地不可不

素畜下部議每歲分米二萬石命著爲令

十四年土木之變議者請燒通州倉以絕虜望于謙曰國
之命脉民之膏脂顧不惜耶傳示城中有力者恣取之
數日粟盡入城矣

景泰三年御史左鼎奏國家承平日久而公私恆患於不
足逮至軍興尤爲窘蹙於是賣官鬻爵凡衰世苟且之
法一切舉而行之科歛愈煩國用愈匱誠能痛抑末枝
嚴禁遊惰凡工商僧道之流減汰抑遏悉驅而歸之農
官吏將士之無用者罷斥揀擇毋使其冗食開廣屯田
以漸實邊廩量減士卒以稍紓邊餉與凡不急之役無

益之費如寺觀營造供佛飯僧之類一絕之而不爲專以務農重穀爲本而尤躬行儉約以率之慎擇守令嚴條約以督勵之持之悠久行以至誠則何患戶口不增賦稅不廣民財不裕國用不足哉

天順五年都御史李賓言各處預備倉多空虛猝遇饑饉何以爲賑宜令有司出官庫物糴之且多方措置雜犯死罪而下俱納米以贖季上其數於上司上司時盤驗之歲暮類奏以憑稽考

成化三年學士商輅陳言時政內廣儲積一款言臣切見各處預備倉所儲米穀本以賑濟饑民每歲官司取勘口數呈老止將中等人戶開報其鰥寡廢疾無所依倚者一槩不報蓋慮其無力還官負累賠納故也今後各處預備倉饑民關過米穀不拘豐中年歲通取息一分有係鰥寡廢疾無所依倚之人不必追徵將所收之息抵補其數抵補之外或有餘剩自作正數入倉仍乞令巡按分巡等官嚴督府州縣正官收放之際務在親行提調痛革出納之弊庶幾官無虛費民得實用

七年八月修舉預備四倉勅曰洪武年間每州縣各設預備四倉所以廣儲蓄備旱潦著在令典民咸賴之比年所司因循廢弛視爲虛文是以一遇饑荒民無仰給今

特命爾修舉預備之政勅至爾布政司按察司掌印官
卽督同各府州縣正官將原設四倉查勘有無見在糧
數若干多寡除見有外應該添糧若干先儘各處在官
贓罰等項錢糧支給收納及令囚犯照例納米贖罪如
有不敷或於存留內借撥或於各里上中戶稅糧內米
正糧一石另勸米麥共五升或有可行從宜區處如里
分用糧數多原設倉廩不穀收貯亦須量爲添益遇饑
寒照例賑給秋成之日抵斗還官如連年豐稔倉糧亦
須易新勿令腐爛其看倉大戶老人於附近里分僉點
殷實有行止之人充當不許濫設敢有不行用心看管

有通同官吏插和糠粃沙土實收虛放侵欺作弊使小
民不受實惠者爾等就行拏問治以重罪其軍衛屯所
原設有預備倉爾都布二司掌印官一體督同衛所正
官并屯田官員照例整理爾三司并府州縣衛所該管
官員務要遞相督率十分用心從長區畫三年之內務
臻實效不許仍前怠慢虛應故事如違許巡按御史通
行糾舉應拏問者就便拏問應奏請者叅奏究治爾等
每遇歲終將收過倉糧數目從實奏報毋或稽遲故勅
十八年正月命南京糶常平倉糧時歲饑米貴南京戶部
請減價糶以濟民候秋成平糶還倉

二十年十二月署戶部事侍郎李衍奏山東河南直隸等處連旱穀無所出州縣當輸邊者數橐銀就糴以輸米踊貴斗至數百錢然亦無甌石賣者而官吏催督勢甚張皇宜從便宜輸銀太倉以太倉之粟轉於邊從之弘治三年定預備倉糧州縣每十里以上積糧一萬五千石州縣官考滿稽其備荒積穀多少以爲殿最

〔按國初立預備倉卽古常平倉遺意蓋支給官鈔和糴以備凶荒耳正統後許將囚罪贖罪米收入然無定數成化後始有每里積三百石或五百石之例然未有不及數之罰弘治後或有不及數罰俸及降用之例夫不

問其所取之由而但責其所積之數豈能無弊哉

正德十六年七月 世宗以京師久雨米價騰踊諭戶部發京倉及通州倉糧五十萬平價出糶有富豪積貯於家乘時射利者治其罪戶部條議以請 上命亟行之嘉靖元年南京工部侍郎吳廷舉言先年罪人以金贖刑貯工部以備修營弘治末南京戶部奏改納米補各官卒祿廩及囹圄囚食今覈戶部錢穀約定支給宜將贖銀貯常平倉備賑下刑部覆議從之

三年七月直隸巡按御史王官請命戶部鑄造鐵斛頒給宣大諸倉以爲出納之準 上從之因命併給諸邊

四年廬州知府龍誥在任修蓋義倉置買義田行賑糶賑
貸賑濟之法又條積畜便民八事戶部覆議得旨龍誥
留意備荒有裨仁政加官一等所奏事宜撫按官勘果
便利通行各府州縣做誥所行隨宜酌處以備賑濟有
成效者具奏加陞如例

五年先是河南山東州縣歲輸太倉粟米民皆領價有司
市之京師時京城米貴計值當虧正課三之一民莫能
辦乃願盡輸原領價銀戶部請從民便每石輸價銀八
錢五分加耗五分上許之命來年仍納本色如故

七年正月御史王重賢等陳三事一均蠲免一議積穀請
令各省撫按嚴督所屬州縣凡贖罪折紙俱納穀米不
許收價銀以滋侵漁之弊其無碍官錢及引契魚鹽茶
酒諸果稅不係解部者當趁秋成糶穀備用一肅倉場
言京通二倉監收糧運自官吏以及軍斗諸役畱難需
索蠹弊多端宜行禁約至於御馬等倉天師菴等草場
收納各處芻菽其弊尤甚請自今冬令商人不必運赴
內府止於京倉空厥收貯每石扣銀三分遇該監取用
芻菽以爲搬運脚費部覆仲賢等言皆切於時弊可從
惟芻菽運赴內府立法已久難以輕變詔從部議

八年戶部尚書王瓚應詔陳倉場六事一謂運官勅納京

倉板木乞照通倉事體革去內臣止令員外收受其板木亦隨糧共納一倉以便取用一謂近來監督衙門以運官違限科罰輒銀甚非朝廷優恤之意宜勅戶部嚴行禁革一謂太倉庫役人多年久爲奸窟銀匠庫子須一年一易斗級一年四易一謂太倉庫貯低銀四萬四千餘兩恐歲久生弊當給爲巡捕官軍草料其銀照成色遞加一謂各處解到庫銀率多細碎易起盜端乞行各府州縣今後務將成錠起解并紀年月及官吏銀匠姓名一謂各草場多有包攬不遂乘機放火乞令各該官攢同管場內臣率夫役協力巡守 上允行之

二月兵部侍郎王廷相言義倉之法但立之於州縣則窮鄉下壤百里就糧旬日待斃非政之善者惟宜貯之里社一村之間約二三百家爲一會每月一舉社正率屬讀高皇帝教民榜文舉衆中善惡獎戒之其社米第上中下戶捐數多寡各貯於倉而推有德者爲社長能善事會計者副之若遭荒歲則計戶而散先下與中者後及上戶上戶則償之而免其下與中者凡給貸悉聽於民第令登計冊籍以備有司稽考則旣無編審之煩又無奔走之苦且寓保甲以弭盜鄉約以敦俗之意一法而三善具章下戶部尚書梁材覆奏從之

九年正月科臣言捐租之惠不及貧民請太倉銀三萬濟河南又言有司積穀五百里不及五百石三百里不及三百石者罷

十年六月應天巡撫毛思義言府尹江曉等積穀溢於原數蘇松常鎮等府知府聶豹等不及限詔令曉等體國爲民分別等第豹等各守郡反不及數行政守已可知參究以聞仍通行天下撫按查冊送部以憑朝覲黜陟

十二年戶部尚書許讚奏令郡縣衛所在贓贖緩引價稅課等銀多肆乾沒宜命盡數糴穀貯倉俾賑從之

十四年正月復革京通及徐淮倉提督內臣先是嘉靖初各倉內臣俱革後李宜貞緣外戚復提督京倉給事中孟奇力諫不聽已而復以王奉李慎督京通二倉徐淮臨清亦漸復用及張孚敬議革鎮守監倉市舶各內臣獨不及宜等以故王奉李慎恣肆日甚至給事中管懷理等言王奉李慎大肆饕餮橫行科索輦轂之下竊柄殘民乞革逐勿補下戶部議尚書梁材覆奏京通等倉戶部職掌督收則有侍郎郎官巡視則有御史宣德正統以來始用內臣亦止一二而已正德間陸續增置皇上銳意釐革量用數人而奉等多方掊刻病卒剝民至於臨淮等倉俱有內臣管理宜一體革還從之

全州知州林元秩奏請設立社倉置田收租備賑時州民
趙希尹輸穀五千石爲經費元秩言於巡按御史鄭濂
爲請建坊或賜秩以旌其義事下戶部查例請量加職
銜 上曰納粟事例止於加散官職品濂元秩乃請官
爲建坊必有交通情弊令巡撫查覈以聞於是巡撫陶
諧言濂與元秩意在獎義勵俗非有他也戶部覆議買
田備賑終非良法宜將所置賑田還給希尹其儲蓄事
宜官自區處毋煩百姓得旨近例命有司積穀備賑非
欲用民財買田立倉也元秩違例擅行降二級餘如擬
二十年十二月江西巡按沈越請勅戶部申明行天下各

府州縣鄉倉之地不許廢鬻在倉之穀不許變易積穀
之令不許寢格仍令有司自行相勸令鄉各有倉倉各
有積撫按每歲稽其成功驗其勤惰以行賞罪開報吏
部課殿最以行黜陟 上令戶部亟加申飭以裨荒政
山東巡按毛鵬言預備倉之設本以濟荒近多廢弛宜亟
行修復今東昌旣已繕葺可聽其便宜入穀濟兗青萊
登五府宜嚴督所司建置責令依期儲穀備賑從之
二十一年給事中胡賓言通倉糧米積至六百餘萬衆謂
不宜大多今畿輔災傷宜行入府自備人夫車輛關支
運回發糴戶部尚書李如圭謂賓言可採 上曰京倉


先因都城米貴乃平糶以紓民急原非賑饑正法亦無
發糶外郡之例該部非時具題又謂通倉米過多已不
諳事今各守臣未有奏請而無故發米數萬散糶則必
強令舖行關領貧民不得受賜况出辦人夫車輛往返
之費大畧相當豈救荒之長策其再議處以聞胡賓旣
知民饑但宜謂賑而干預所司處分何也姑宥之

四十年御史顏鯨言祖宗朝設有便民等倉以贖罰糶穀
貯之近以大工徵解助工今明堂壽宮工程已竣歲復
大稔宜下免解贖罰之令及發內帑所貯雲南新錢使
所在糶穀備荒章下戶部覆議詔發帑錢七百萬糶穀

貯京通二倉在外贖罰俱留該地方積穀貯倉如例

四十三年三月 上問輔臣徐階太倉今有贏餘否階言
年來太倉止有二三年之儲而一歲所入僅足歲出惟
有前歲四月米賤給放折米銀十萬省出月米八萬石
耳因言折米之法行於水旱之歲以裕災民放於米賤
之時以增倉儲軍民兩濟是在戶部留意行之耳 上
因諭戶部講求國計尚書高耀條上八事從之

十月直隸巡按御史宋纁言各府縣歲派積穀之數徒資
貪吏措剋無益實用中間廉靖者往往首鼠兩端不能
自決今上策莫如罷之不則稍減其數庶官民兩便戶



部覆積穀備荒原非弊政但係奉行者之賢不肖不可輕議變法且先年給事中胡廉以奏行減半之例必不得已再減其半可也 上從部議

四十五年四月戶部言京通二倉漕糧及徐州臨德倉食糧本色太少請行各撫按官今後不得藉口災傷輕議改折得旨足國恤民二義俱重今後遇有災傷戶部酌議奏請改折銀兩專備給軍毋令他用

隆慶三年七月給事中劉繼文言今災傷日奏而有司方且請發內帑請蠲租賦問以積穀幾何則不能知豈爲民司牧之道也請下各該撫按亟查被災地方應賑丁

口將貯庫贖及無碍官銀先糴穀備賑其積穀事宜仍勅撫按嚴覈有司軍衛奏報積穀數目以俟稽察戶部是其議 上曰積穀備賑所在有司其從實舉行奏報之日該部如例分別以請

戶部覆陝西巡按王君賞奏近時有司積穀之數雖已半減然州縣大者數萬石小者猶數千石卽日入民於罪不可得盈宜再減其額十里以下歲額穀千石十里以上遞增百里以下二千五百石二百里以下三千石卽劇郡無過五六千石而止則官不擾而穀易積從之

時戶部以葭州知州尹際可等三十五員各積穀徵賦不

如數例當降調移文吏部吏部言積穀較之正賦不同
况皆出於賦罰紙贖及他設處所入之數視地方貧富
獄訟繁簡爲差若必欲所在取盈是徒開有司作威生
事之端今宜治其侵漁者若止怠玩仍當分別輕重明
註考語俟本部劣處不必遽議調降從之

湖廣撫按劉懋雷稽古等奏所屬府州縣官積穀不如數
者戶部覆罰俸有差

四年三月裁革南京糧儲都御史以其事屬之南京戶部
侍郎仍設巡倉御史一員以佐之

五年山西巡撫靳學顏疏言社倉卽義倉也唐時義倉之
開每歲自王公以下皆有入是以其積獨多宋則准各
民正稅之數於二十分而取其一以爲社蓋富者必田
多田多則稅多稅多則社入多亦唐意也要之其出也
則中歛賑極貧大歛賑中戶又大歛焉乃沾及於富室
所謂恩澤之加自無告始也臣請下之各省以唐宋歛
穀之法爲則而就土俗合人情限明春以裏盡報各府
已前見貯之數以品其虛盈於明年冬末通計一歲二
倉新收之穀以驗其功能著而爲令歲歲修之在官倉
者時其豐歉而歛散之利歸於官若民有大饑則以賑
之在民倉者時其豐歉而歛散之利歸於民雖官有大

役亦不許借此藏富於民卽藏富於官也

九月戶部覆斬學顏奏請以所省防秋客兵銀并鹽課銀六萬發各府縣糴穀備荒又修復社倉令所在皆有餘積上曰積穀備賑成規俱在有司奉行者少一值旱澇卽云無策戶部令各撫按以實行之無爲文具

附庫貯

洪武九年八月 上覽宋史見太宗改封樁庫爲內藏庫謂侍臣曰人君以四海爲家因天下之財供天下之用何有公私之別太宗宋之賢君亦復如此他如漢靈帝之西苑唐德宗之瓊林大盈不必深責也宋自乾德開寶以來有司計度支所缺者必籍其數以貸於內藏候課賦有餘則償之凡有司用度乃國家經費何以貸爲缺而許貸貸而復償是猶爲商賈者自與其家較量出入及內藏旣盈乃以牙籤別其名物叅驗帳籍晚年出籤示真宗曰善保此足矣詒謀如此何足爲訓書曰慎

厥終惟其始太宗首開私財之端及其後世困於兵革
三司財帛耗竭內藏積而不發間有發緡錢幾十萬以
佐軍資便以爲能行其所難皆由太宗不能善始故也
十二年正月 上觀漢武紀謂吳況曰人君理財之道當
視國如家一家之內其父經營儲積未有不爲子計者
父子而異貲其家必隳矣君民猶父子也若惟損民以
益君衣食不給而君獨富豈有是理哉

十九年三月 上諭戶部曰善理財者不病民以利官必
生財以阜民前代理財竊名之官皆罔知此道謂生財
裕國惟事剝削蠹蝕窮錙銖之利生事要功如桑弘羊

之商販揚炎之兩稅自謂能盡理財之術殊不知其取
財有限而傷民無窮我國家賦稅已有定制樽節用度
自有餘饒減省徭役使民不廢耕女不廢織厚本抑末
使游惰者皆盡力田畝自然家給人足積蓄富盛爾戶
部正當究心毋爲聚斂以傷國體

永樂二十二年十月 仁宗革戶部及南京戶部行用庫
初建行用庫市民間金銀至是罷市革之

正統七年七月始置戶部太倉庫
成化十年十一月運太倉銀三十一萬兩以給邊需

二十年九月巡撫都御史葉淇奏山西連年災傷乞給太

倉銀數萬兩以備賑濟詔發京庫銀三萬兩遣官齎付
洪羅糧應用俟年豐徐議還官

弘治十年十一月詔取太倉銀三萬兩爲張燈具戶部尚
書周經力論不可費小民脂膏止之

十三年正月給事中曾昂以邊方調度日繁請令諸布政
司公帑積貯及均徭羨銀盡輸太倉戶部尚書周經言
用不足者蓋以織造賞賚齎土木之故若一切節省
自宜少裕必欲盡括天下之財豈藏富於民之意乎

十六年三月戶部尚書侶鍾疏言冗食太多宜汰
吏光祿寺供應太繁宜減內侍及畫工番僧酒饌天下

其內繁冗

